



BOSNA I HERCEGOVINA  
Ministarstvo odbrane-obrane



БОСНА И ХЕРЦЕГОВИНА  
Министарство одбране



# БИЛТЕН БИЛТЕН

MINISTARSTVA OBRANE-ODBRANE I ORUŽANIH SNAGA BOSNE I HERCEGOVINE  
МИНИСТАРСТВА ОДБРАНЕ И ОРУЖАНИХ СНАГА БОСНЕ И ХЕРЦЕГОВИНЕ

★ мај/свибанј 2010. број 4 ★

★ мај 2010. број 4 ★



## PUT BIH DO MAP-a

Intervju sa komandantom NATO štaba u Sarajevu,  
brigadnim generalom John W. Bullardom

UČEŠĆE PRIPADNIKA OS BIH U MISIJI ISAF  
U AFGANISTANU

RJEŠAVANJE VIŠKOVA  
NAORUŽANJA I VOJNE OPREME

## TEME



Put BiH do MAP-a

str. 3



Rješavanje viškova naoružanja i vojne opreme

str. 5



Učešće pripadnika OS BiH u misiji ISAF  
(Snage međunarodne sigurnosne pomoći)  
u Afganistanu

str. 7



Proces tranzicije vojnog personala u OS BiH  
podmlađivanje i otpust vojnog personala.

str.10

## INTERVJU



Intervju sa komadantom NATO  
štaba u Sarajevu,  
brigadnim generalom John W. Bullardom

str.12

## AKTUELNOSTI



Januar-maj 2010. godina

str.14

## PREDSTAVLJAMO



Održavanje 51. Svjetskog  
vojnog prvenstava  
u skijanju u BiH

str.22

### IMPRESSUM

Bilten Ministarstva odbrane BiH i  
Oružanih snaga BiH  
Broj:4  
Maj 2010. godine

Izdavač: Ured za odnose  
s javnošću MO BiH  
Urednik: Uma Sinanović  
Saraduju: Mirko Gašević,  
Antonija Perak i Ahmed Čuprija  
Lektor: Miodrag Filimonović  
Tehnička obrada: Dušan Gređo  
Prevodilac: Maja Blagovčanin

Ured za odnose s javnošću  
Ministarstva odbrane BiH  
adresa: Hamdije Kreševljakovića 98  
Sarajevo  
e-mail: info@mod.gov.ba  
kontakt: telefon 033/286-680,  
faks 033/286-685  
web: www.mod.gov.ba

# PUT BIH DO MAP-a

## *NATO Partnerski ciljevi (Partnership Goals-PG) za Bosnu i Hercegovinu i obaveze preuzete u Procesu planiranja i revizije (PARP)*

Bosna i Hercegovina je, u okviru Prezentacijskog dokumenta BiH (PD BiH), preuzela obavezu razvijanja različitih mehanizama interaktivne saradnje sa NATO-om, a jedan od njih je i Proces planiranja i revizije (u daljnjem tekstu: PARP). Ovo je drugi dvogodišnji ciklus PARP-a u kojem učestvuje BiH, a koji je započeo slanjem odgovora na PARP Upitnik. Inače, PARP je NATO program usmjeren ka promoviranju transparentnosti u planiranju državne odbrane i boljoj pripremi snaga partnera za saradnju sa snagama Saveza. On teži podsticanju razvoja interoperabilnosti između snaga partnera i saveznika u punom spektru PfP operacija, te obuke i vježbi koji se na to odnose.

U okviru procesa PARP-a, NATO tim iz Brisela boravio je u BiH u periodu od 16. do 17. februara 2010. godine i na ovim radnim sastancima se diskutiralo o Partnerskim ciljevima BiH. Partnerski ciljevi za BiH razvijeni su na osnovu PARP Ministarskih smjernica zemalja članica NATO, PARP Procjene BiH i Partnerskih ciljeva 2008. Ministarstvo odbrane BiH, kao vodeće ministarstvo za PARP, u saradnji sa NATO Koordinacijskim timom Vijeća ministara BiH, Ministarstvom sigurnosti i Ministarstvom vanjskih poslova BiH, u navedenom periodu su usaglasili sadržaj teksta Partnerskih ciljeva i ažurirali tekst PARP Procjene BiH. Predstavnici NATO tima iz Brisela su naglasili da je napravljen vidan iskorak u pogledu implementacije partnerskih ciljeva u odnosu na poslednji sastanak održan u 2009. godini. Delegacija BiH je prisustvovala sastanku Euro-Atlantskim Partnerskim Vijećem (EuroAtlantic Partnership Council-EAPC) u formatu 28+BiH s ciljem diskusije i davanja dodatnih pojašnjenja o Partnerskim ciljevima i PARP Procjeni BiH, koji je održan 22. marta 2010. godine u Briselu, u sjedištu NATO-a. Delegaciju BiH, predvođenu Zamjenikom ministra odbrane za politike i planove, gospodinom Živkom Marjancom činili su predstavnici Ministarstva odbrane BiH, Ministarstva sigurnosti BiH i Ministarstva vanjskih poslova BiH. Nakon sastanka i unošenja dodatnih komentara, sadržaj teksta Partnerskih ciljeva BiH i PARP Procjena poslata je članicama NATO, shodno procedurama šutnje.



### *II Implementacija Individualnog partnerskog akcionog plana (IPAP BiH)*

Saradnja BiH i NATO-a na nivou IPAP i dalje je jedan od najznačajnijih mehanizama partnerskih odnosa, posebno u oblastima produblivanja međusobne saradnje i provođenja reformskih procesa u zemlji. NATO Koodinacijski tim VM BiH je u oktobru 2009.g. pokrenuo proces pripreme i izrade dokumenta novog ciklusa IPAP BiH, za period



2010-2012.g., na osnovu preporuka i smjernica NATO-a, kao i stečenih iskustava iz prethodnog ciklusa IPAP-a. Početkom februara 2010.g definiran je prvi draft pomenutog dokumenta, koji je trenutno u fazi ažuriranja, kako bi se mogao dostaviti NATO Štabu u Brisel na usaglašavanje. Po usaglašavanju dokumenta, provest će se zakonske procedure usvajanja dokumenta u institucijama BiH, kao i konačno odobravanje na nivou NATO-a, čime bi postao i važeći dokument narednog ciklusa IPAP-a BiH. Posebno bitan segment ovog procesa je tzv. *Samoprocjena implementacije IPAP BiH za 2009.g.* (Samoprocjena), koja je u januaru 2010.g. dostavljena NATO Štabu u Briselu (prema instrukcijama NATO-a i priložima resornih ministarstva BiH), koju je pripremio NKT VM BiH, u saradnji sa relevantnim ministarstvima i institucijama BiH.



U Samoprocjeni je detaljno opisana i objašnjena implementacija svih aktivnosti IPAP BiH tokom prošle godine. Potom je uslijedila posjeta eksperata NATO-a, u periodu od 23. do 26. februara, kada je izvršeno konačnog usaglašavanje i dorada predmetne Samoprocjene. Ekspertni tim NATO-a će, u narednom periodu, izraditi vlastitu *Procjenu implementacije IPAP BiH za 2009.g.* i dostaviti je svim članicama NATO-a, nakon čega će biti data i konačna procjena uspješnosti implementacije IPAP BiH, u formatu „28 + BiH“, odnosno formatu u kojem prisustvuju predstavnici svih NATO zemalja i predstavnici zemlje koja učestvuje u IPAP-u (u ovom slučaju BiH).

Napominjemo da je šef Ekspertnog tima NATO-a, gosp. Jaroslaw Skoniecka, u završnom dijelu posjete istakao da Samoprocjena predstavlja izuzetno dobru osnovu i kvalitetno pripremljen dokument koji će poslužiti za izradu NATO procjene implementacije IPAP BiH u 2009.g. Tokom razgovora je konstatovano da je u okviru IPAP BiH tokom 2009. godine u oblastima političkih i sigurnosnih pitanja, odbrambenih i vojnih pitanja, pitanjima javne diplomacije, upravljanja krizama, te pitanjima sigurnosne zaštite i resursa učinjen pozitivan pomak, a u budućem periodu, kako je naglašeno, treba zadržati ovaj trend kako bi se osigurali svi preduslovi za dalje razvijanje međusobne saradnje sa NATO-om, na funkcionalno višim nivoima. Također, istaknuto je da se realizacija većeg dijela planiranih aktivnosti odvijala u



planiranim vremenskim okvirima i predviđenog obima implmentacije. Predstavnici Sjevernotlanskog Vijeća, na čelu sa Generalnim sekretarom NATO-a su posjetili Bosnu i Hercegovinu 23. marta 2010. godine, kada je jasno naglašeno da je u BiH neophodno postići napredak u reformama (u pogledu korekcije izbornog zakona i poštivanja prava manjina, rješavanja pitanja vojne imovine, uništavanje viška vojnog naoružanja, slanje vojnika u Afganistan) kao važan preduslov pristupanju programu MAP, što je posljednji stupanj pred ulazak u NATO. Na sastanku Sjevernoatlanskog Vijeća (North Atlantic Council-NAC) u formatu Ministara vanjskih poslova država članica NATO, održanog 22. aprila 2010. godine u Talinu, BiH je dodijeljen Akcijski plan za članstvo u NATO (Membership Action Plan-MAP). Međutim, MAP će početi sa implementacijom nakon što nepokretna vojna imovina bude registrovana kao državna imovina.

# RJEŠAVANJE VIŠKA NAORUŽANJA I VOJNE OPREME

Upoređivanje podataka iz operativnih evidencija Oružanih snaga Bosne i Hercegovine o ukupnom stanju naoružanja, municije i minsko-eksplozivnih sredstava (MES-a) sa odobrenim Materijalnim formacijama komande i jedinica Oružanih snaga BiH, uvažavajući Odluku o opremanju Oružanih snaga BiH osnovnim naoružanjem i sistemima naoružanja i opreme, te Odluku o odobravanju borbenih kompleta MTS klase V i formiranju strateških rezervi, omogućilo je podjelu ukupnih količina "pokretne vojne imovine" na perspektivnu i onu koja je višak za buduće opremanje Oružanih snaga BiH.


Kategorija	Ukupna količina	Perspektivno prema materijalnoj formaciji	Višak
Naoružanje	105.465 kom	24.143 kom	91.331 kom
Municija i MES	cca 27.157 tona	cca. 7.500 tona	cca. 19.657 tona

Oružane snage Bosne i Hercegovine raspolažu sa 105.465 komada raznih vrsta naoružanja i cca. 27.157 tona raznih vrsta municije i minsko-eksplozivnih sredstava (MES-a). Od toga je cca 19.657 tona višak za Oružane snage BiH. Naoružanje je uskladišteno uglavnom na svim lokacijama gde su raspoređene OS BiH, a municija na 18 lokacija. U perspektivi, u skladu sa odlukom Predsjedništva BiH o veličini, organizaciji i lokacijama OS BiH, lokacije za skladištenje naoružanja treba svesti na 2 perspektivne lokacije, a municiju i MES na 5 perspektivnih lokacija.



## Prodaja municije i viška naoružanja

Predsjedništvo BiH je na 62. redovnoj sjednici koja je održana 8. oktobra 2009. godine, a na prijedlog Ministarstva odbrane BiH donijelo Odluku br. 01-011-2562-47/09 o tome šta treba biti prodato, šta uništeno, a što donirano.



Zaključkom donijetim na 69. redovnoj sjednici održanoj 22.03.2010. godine, Predsjedništvo BiH je zadužilo Ministarstvo odbrane BiH da izvrši pripreme za uništavanje svih količina suvišnog lakog naoružanja i visokorizične municije i MES-a, te da po pribavljanju saglasnosti od donatora uništi svo suvišno donirano naoružanje, municiju i MES. Implementacijom gore navedenih zaključaka praktično se uništavaju sve zalihe suvišnog lakog naoružanja (cca. 80.000 kom), te neće biti prodaje ove vrste naoružanja. Prema NATO kriterijumima i preporukama urađenim od tehničkog osoblja OSCE-a i EUFOR-a, svi viškovi municije i MES-a na zalihama OS BiH se svrstavaju u kategoriju visokorizične municije, tako da je upitna mogućnost prodaje iste. Jedina sredstva koja su suvišna za OS BiH, a nisu tretirana gore navedenim dokumentima, jest naoružanje velikih kalibara koje je predmet kontrole po Sporazumu o subregionalnoj kontroli naoružanja.

### **Uništavanje municije i viška naoružanja**

Uništavanje neispravne i nestabilne municije i minsko-eksplozivnih sredstava je vrlo zahtjevan, skup i dugotrajan proces. Do sada su se uglavnom koristile dvije metode za uništavanje i to:

1. metoda Obod - uništavanje eksplozijom na poligonima Manjača i Glamoč (municija koja je proglašena najnestabilnijom kontrolno tehničkim pregledom stručnih ekipa),
2. metoda delaboracije - rastavljanje projektila nakon čega nastaju sekundarne sirovine i delaborirani eksploziv.

MO i OS BiH navedene aktivnosti sprovode u kontinuitetu.

Delaboracija nestabilne municije i MES-a vršena je na četiri lokacije - Radionica "POLAGAN" u Doboju, firma "UNIS-PRETIS" Vogošća, firma "BINAS" Bugojno i firma "IGMAN" Konjic, a uništavanje metodom detonacije na dva poligona - "Manjača" Banja Luka i "Gladna Brda" Glamoč.

Od 01. 01. 2006. godine do 31. 12. 2009. godine uništeno je ukupno 6.763.331 tona nestabilne municije i minsko-eksplozivnih sredstava i to u vojnim kapacitetima cca 5.100 tona, a u komercijalnim kapacitetima cca 1.700 tona. Projekat uništavanja municije se izvodi pod Projektom kontrole i redukcije malog naoružanja u BiH (SAC BiH) koji je odobren od Vijeća ministara BiH.



Od stupanja na snagu Zakona o odbrani BiH, uništeno je sveukupno 7.678 komada raznog naoružanja. Ova uništenja su izvršena u prvoj polovini 2006. godine i bila su rezultat započetih projekata na rješavanju viškova naoružanja u BiH, u saradnji sa UNDP, preko Vlada entiteta.

### **Plan rješavanja viška naoružanja i municije**

U skladu sa utvrđenim viškovima prema Odluci Predsjedništva BiH o utvrđivanju viškova naoružanja, municije i MES-a u Oružanim snagama BiH i principima njihovog rješavanja (br. 01-011-1599-32/09 od 10.06.2009.), Odluci Predsjedništva BiH o rješavanju viškova naoružanja, municije i MES-a za Oružane snage BiH (br. 01-011-2562-47/09 od 2009/8/10.), Ministarstvo odbrane je preduzelo mjere na realizaciji istih.

Shodno tome donesene su operativne mjere iz nadležnosti Ministra odbrane kroz Odluke o:

- doniranju naoružanja i municije afganistanskim snagama sigurnosti;
- doniranju naoružanja i municije Republici Srpskoj - Ministarstvu unutrašnjih poslova Republike Srpske;
- doniranju naoružanja i municije Federaciji BiH - Ministarstvu unutrašnjih poslova Federacije BiH;
- dodjeli muzejskih eksponata za opremanje muzeja pješadijskih pukova Oružanih snaga BiH.

Najznačajnija donacija do sada je bila za Snage sigurnosti Afganistana i to početkom 2007. godine. Donirano je 4.500 kom. automatskih pušaka M70, 400 kom. puškomitraljeza M72 i 1.000.000 metaka 7,62 x 39 mm (Odluka Predsjedništva BiH br. 01-011-2177-33/06 od 13. decembra 2006. godine). Trenutno je na međunarodnom nivou u pripremi jedna donacija i to opet za afganistanske snage sigurnosti. Radi se o 15.000 automatskih pušaka M70 7,62 x39 mm, 60 komada haubica D30 122 mm i 1000 kratkih mitraljeza ERO 9 19 mm. Takođe, u planu je i doniranje izvjesnih manjih količina naoružanja i municije entitetskim MUP-ovima.

### **Kontrola uništavanja viška naoružanja**

Ministarstvo odbrane BiH je vršilo kontrolu uništavanja viškova nestabilne municije u situacijama kada je MO BiH direktno sklapalo ugovore za izvršenje istih (primjer BINAS Bugojno). Kontrola se nije vršila u situacijama kada je konkurs raspisivao UNDP jer se u tim situacijama radilo o međunarodnim ugovorima čija je kontrola vršena od strane UNDP, kao ugovarača. Nadalje, firme namjenske industrije su u većinskom državnom vlasništvu i njihovo poslovanje je predmet redovnih inspekcija (na kvartalnoj osnovi) od strane resornog ministarstva (Federalno ministarstvo energije, rudarstva i industrije - FMERI). Poslednji stepen kontrole je od strane Ministarstva vanjske trgovine i ekonomskih odnosa koje im na godišnjoj osnovi produžavaju ili ne produžavaju dozvolu za obavljanje osnovne djelatnosti. Međunarodne organizacije UNDP i OSCE su uveliko doprinijele rješavanju viškova naoružanja, municije i MES-a u Oružanim snagama BiH.

Jedan od najvidljivijih načina njihovog doprinosa bilo je i organizovanje radionica na kojima su najviše strukture vlasti razgovarale o rješavanju i konačnom raspolaganju svim pravima i obavezama na pokretnoj imovini koja će dalje služiti za potrebe odbrane.

# UČEŠĆE PRIPADNIKA OS BiH U MISIJI ISAF (snage međunarodne sigurnosne pomoći) U AFGANISTANU

U skladu sa svim relevantnim Rezolucijama Vijeća ministara, ISAF-ova glavna uloga je da pomogne afganistanskoj Vladi da obezbijedi sigurnu i stabilnu sredinu. U tom cilju, ISAF snage sprovede operacije radi sigurne i stabilne zemlje, u saradnji sa afganistanskim snagama državne sigurnosti, koje su direktno uključene u razvoj afganistanske državne vojske kroz mentorstvo, obuku i opremanje.



Opređjeljenje Bosne i Hercegovine da učestvuje u misiji SAIF u Afganistanu predstavlja jedan od najuvjerljivijih argumenata kojim Bosna i Hercegovina opravdava i potkrepljuje svoju ambiciju za ulazak u NATO savez u namjeri da svoju bezbjednost poveže sa bezbjednošću i perspektivama neposrednog okruženja, regije, Evrope i međunarodne zajednice u cjelini i svjesna da članstvo u bezbjednosnim organizacijama obavezuje na prilagođavanje ciljevima i zahtjevima Saveza imajući u vidu da će, dugoročno gledano, NATO u budućnosti i dalje predstavljati značajan faktor globalne bezbjednosti. Bosna i Hercegovina je jedna od rijetkih zemalja koja je stekla dragocjena iskustva u učešću u mirovnim misijama širom svijeta, čak i prije nego što je uslovno pozvana u MAP.

Bosni i Hercegovini čiji je krajni cilj ulazak u evroatlantske integracije, poziv za učešće u misiji ISAF u Afganistanu otvoren je od momenta donošenja odluke o uspostavljanju ove misije. Da bi postala partner zemljama učesnicama misije ISAF, BiH je morala provesti određene procedure i izvršiti predviđene aktivnosti u pravcu potpune pripreme za uzimanje učešća u misiji ISAF, počev od samog izviđanja u zemlji korisnici misije, preko pripreme i obuke ljudstva, do pripreme prijedloga i donošenja odluke o učešću u misiji ISAF u skladu sa zakonskim uslovima i tačno određenim snagama i sredstvima.

**Dokumentom "Opšti pravci i prioriteti za provođenje vanjske politike Bosne i Hercegovine", usvojenim na Predsjedništvu BiH 26. marta 2003. godine, a zatim i Zakonom o odbrani BiH i Zakonom o službi u Oružanim snagama BiH, utvrđeno je da pristupanje BiH evroatlantskim integracionim procesima i sistemu kolektivne bezbjednosti ugrađenim prvenstveno u političko-vojnim strukturama NATO saveza predstavlja prioritet čije će provođenje nesumljivo doprinijeti unutrašnjoj stabilnosti i bezbjednosti zemlje.**

Misija BiH u Snagama međunarodne bezbjednosne pomoći (ISAF) u Afganistanu započela je donošenjem odluke Predsjedništva BiH o učešću pripadnika Oružanih snaga BiH u ovoj misiji.

Odlukom Predsjedništva BiH od 05.01.2009. godine odobreno je učešće 10 oficira BiH u štabnim komandama pri misiji ISAF u Afganistanu.

Njihova misija je izvršavanje operativnih, administrativnih i drugih štapskih zadataka i poslova koje zahtjeva formacijsko mjesto na dužnosti članova štabova u sastavu kontingenta Oružanih snaga SR Njemačke i kontingenta Oružanih snaga Kraljevine Danske.

Istom odlukom Predsjedništvo BiH je zadužilo sve institucije u BiH, a prvenstveno Ministarstvo inostranih poslova i Ministarstvo odbrane, kao i Vijeće ministara BiH, da se maksimalno angažuju na ispunjavanju svih uslova koji stoje pred BiH za punopravno članstvo u NATO-u.

Djelujući u skladu sa datim zaduženjem i ovlaštenjima, Ministarstvo odbrane BiH je odmah započelo proces realizacije odluke Predsjedništva BiH, tako da se jedan od važnih koraka na njenom ostvarenju desio već 11. 03. 2009. godine u Briselu gdje su Ministar odbrane BiH



dr. Selmo Cikotić i Generalni sekretar NATO-a Jaap de Hoop Scheffer potpisali Sporazum kojim se na standardan i jednoobrazan način, koji važi za sve članice učesnice ISAF-a, utvrđuju uslovi učešća u misiji.

*„Nakon ovog Sporazuma naši oficiri će ići u Afganistan, što do danas nismo mogli formalno realizovati.*

*Potom slijedi i procedura za donošenje odluke o učešću jedinice Oružanih snaga BiH u Međunarodnoj misiji u Afganistanu. Generalni sekretar NATO-a iznio je visoke ocjene za BiH u njenom dosadašnjem doprinosu mirovnim operacijama, kao i za ono što ćemo da uradimo nakon što postanemo partneri u ISAF-u, najkompleksnijoj misiji NATO-a“*, rekao je ministar odbrane dr. Selmo Cikotić, nakon potpisivanja Sporazuma.



Imajući u vidu da Ministarstvo odbrane BiH i Oružane snage BiH kontinuirano rade na obuci i pripremi pripadnika za učešće u operacijama podrške miru, vrijeme potrebno za upućivanje u misije ove vrste svedeno je na minimum, tako da su brzo ispunjeni svi uslovi i već krajem marta 2009. godine uslijedilo je prvo upućivanje dva oficira OS BiH u sastav Danske borbene grupe u Regionalnoj komandi JUG, a zatim od septembra 2009. godine i prvo upućivanje osam oficira OS BiH u sastav kontingenta Oružanih snaga Savezne Republike Njemačke u Regionalnoj komandi SJEVER u Afganistanu. Oficiri rade u komandama navedenih kontigenata kao štabni elementi komande, a prije upućivanja u misiju, proveli su određeno vrijeme na obuci u sastavu kontigenata Oružanih snaga ovih zemalja. Misija oficirima traje 6 (šest) mjeseci, a Predsjedništvo BiH je u januaru 2010. godine produžilo mandat misije na još godinu dana.

Ministarstvo odbrane BiH blagovremeno je pokrenulo procedure za donošenje odluke o slanju jedinica Oružanih snaga BiH u misiju ISAF.

Nakon što je Predsjedništvo BiH na jednoj od sjednica u maju 2009. godine razmotrilo inicijativu Ministarstva odbrane BiH o učešću jedinica OS BiH u misiji ISAF u Afganistanu, donesen je zaključak kojim je obavezalo MO BiH da sagleda situaciju i procjeni mogućnost angažovanja jedinica OS BiH.

Zaduženo je Ministarstvo odbrane BiH da još jednom razgovara sa koalicionim partnerima i strukturama NATO-a, a ministar odbrane BiH da izvidi stanje u Afganistanu i predloži način na koji će se angažovati jedinice Oružanih snaga BiH.

Delegacija Ministarstva odbrane BiH Oružanih snaga BiH, koju je predvodio ministar odbrane dr. Selmo Cikotić, boravila je u Afganistanu od 21. do 24. jula 2009. godine, u cilju procjene mogućnosti angažovanja OS BiH u mirovnoj misiji u ovoj zemlji.

U periodu od jula 2009. do marta 2010. godine, Ministarstvo odbrane BiH je Predsjedništvu BiH dostavilo nekoliko prijedloga za moguće angažovanje jedinica OS BiH u misiji ISAF. Predsjedništvo BiH je u redovnoj proceduri razmatralo svaku od pokrenutih inicijativa, te donosilo odgovarajuće zaključke kojima je tražilo dodatne informacije, ili nastavak pregovora sa koalicionim partnerima o ponudama za angažovanje jedinice OS BiH u ovoj misiji. Tako je Predsjedništvo BiH na sjednici održanoj 10. marta 2010. godine primilo na znanje Informaciju MO BiH o mogućem angažovanju jedinica OS BiH u misiji ISAF i dalo saglasnost za angažovanje 10 instruktora OS BiH u misiju ISAF za obuku afganistanskih snaga sigurnosti, nakon što se provede zakonom propisana procedura.



Predsjedništvo BiH je na 44. hitnoj sjednici održanoj 14. aprila ove godine prihvatilo još jednu informaciju Ministarstva odbrane BiH o mogućnosti angažovanja jedinice Oružanih snaga BiH u misiji Snage međunarodne sigurnosne pomoći - ISAF u Afganistanu.

**Na istoj sjednici data je saglasnost za angažovanje pješadijske jedinice za osiguranje u misiji ISAF u Afganistanu, jačine oko 45 pripadnika u sastavu danske borbene grupe u Regionalnoj komandi JUG.**

Predsjedništvo BiH je zadužilo Ministarstvo odbrane BiH da ostvari koordinaciju sa Ministarstvom odbrane i Oružanim snagama Kraljevine Danske, s ciljem provođenja priprema,

uključujući opremanje i obuku jedinice Oružanih snaga BiH za upućivanje u misiju ISAF.

Predsjedništvo BiH je ovlastilo ministra odbrane BiH da Vrhovnoj komandi savezničkih snaga za Evropu (SHAPE) uputi pismo namjere o spremnosti BiH za učešće jedne jedinice OS BiH za obezbjeđenje u misiji ISAF u Afganistanu, nakon što se provede zakonom propisana procedura.

Vijeće ministara BiH je zaduženo da Predsjedništvu BiH dostavi ocjenu opravdanosti učešća pješadijske jedinice OS BiH u ovoj misiji.



Ocjenu opravdanosti učešća pješadijske jedinice u misiji ISAF donosi Vijeće ministara BiH. Ministarstvo odbrane BiH je dobilo pozitivno mišljenje od Ministarstva vanjskih poslova, Ministarstva finansija i trezora i Ministarstva pravde dok od Ministarstva sigurnosti očekuje odgovor u skorije vrijeme. Nakon toga Ministarstvo odbrane BiH će izraditi prijedlog Ocjene opravdanosti učešća u misiji ISAF i isti dostaviti Uredu za zakonodavstvo Vijeća ministara te onda Vijeću ministara BiH.

Ministarstvo odbrane BiH daje svoje mišljenje i očekuje da će Vijeće ministara BiH dati pozitivnu ocjenu o opravdanosti učešća i zatražiti dostavljanje Predsjedništvu BiH prijedloga odluke o učešću pješadijske jedinice OS BiH u misiji ISAF.

Nakon što Predsjedništvo BiH donese odluku, očekuju se ostale zakonske procedure, a prvenstveno izjašnjavanje Parlamenta BiH o toj odluci, te pribavljanje certifikacije jedinice OS BiH od posebnog NATO tima.

Postupajući u skladu sa zaključkom Predsjedništva BiH Ministarstvo odbrane BiH je uputilo pisma namjera Generalnom sekretaru NATO-a, komandantu Vrhovne savezničke komande za Evropu (SHAPE) i ministru odbrane Kraljevine Danske.

**U skladu sa Zakonom o učešću pripadnika OS BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inostranstvu, odluku o učešću pripadnika i jedinica OS BiH donosi Predsjedništvo BiH. Prije donošenja konačne odluke, Predsjedništvo BiH od Vijeća ministara BiH zahtijeva da pribavi ocjenu opravdanosti učešća u konkretnoj operaciji. Ocjena treba da sadrži spoljno-političke, pravne, odbrambene, sigurnosne i finansijske aspekte.**

**U izradi Ocjene opravdanosti učestvuju relevantna ministarstva BiH. Vijeće ministara BiH dužno je dostaviti traženu ocjenu Predsjedništvu BiH u roku od 60 dana od dana dostavljanja zahtjeva.**

**Parlamentarna skupština BiH dužna je razmatrati odluke Predsjedništva BiH o učešću pripadnika Oružanih snaga Bosne i Hercegovine u inostranstvu takođe u roku od 60 dana.**

# PROCES TRANZICIJE VOJNOG PERSONALA U OS BiH – PODMLADIVANJE I OTPUST VOJNOG PERSONALA

**Odlukom Predsjedništva BiH** o veličini, strukturi i lokacijama OS BiH, definisano je da OS BiH imaju 10 000 profesionalnih vojnih lica i to 50% vojnika, 30% podoficira i 20% oficira.

Zakonom o službi u OS BiH definirana je maksimalna dužina trajanja službe vojnih lica u Oružanim snagama BiH, i to:

- a) oficira - 30 godina, ali najduže do 55. godine života,
- b) podoficira - 30 godina, ali najduže do 50. godine života i
- c) vojnika - 15 godina, ali najduže do 35. godine života.

Prilikom pristupanja u OS BiH budući vojnici potpisuju ugovore na 3 godine, sa mogućnošću produžetka ugovora do 35 godina života ili ukupno 15 godina službe u OS BiH. Ministarstvo odbrane i Oružane snage BiH u 2010. godini provode aktivnosti na izboru i prijemu vojnika u Oružane snage BiH, na osnovu Javnog oglasa objavljenog u julu 2009. godine. Naime, i u toku ove godine vrši se prijem mladih vojnika, proporcionalno broju vojnika koji će po sili zakona morati napustiti OS BiH i u skladu sa Predsjedničkom Odlukom o veličini, strukturi i lokacijama OS BiH.

Do sada, u 2010. godini, obuku je završila prva i druga grupa kandidata za prijem u profesionalnu vojnu službu, odnosno četvrta i peta generacija novoprimljenih vojnika. Prva grupa od 297 mladih vojnika, od kojih je 30 žena, svoje profesionalne ugovore je potpisala 01. 02. 2010. godine, a druga grupa od 296 mladih vojnika od kojih je 25 žena, obuku je završila krajem aprila 2010. godine i od 01. 05. maja su raspoređeni u operativne jedinice OS BiH, u kojima će nastaviti dalje usavršavanje. Dinamika prijema mladih vojnika u profesionalnu službu usaglašena je sa dinamikom procesa otpusta personala iz OS BiH, kako bi se očuvala operativna sposobnost OS BiH. Tako će se, na osnovu Operativnog planu prijema vojnika, prijem treće grupe kandidata od 300 mladih vojnika izvršiti 01.09.2010.godine, a 01.01. 2011. godine planiran je prijem još 300 vojnika. To znači da će biti ukupno 1200 mladih vojnika u Oružanim snagama, koji će biti primljeni na osnovu Javnog oglasa objavljenog u 2009. godini.



**Uzimajući u obzir prijem mladih vojnika na osnovu Javnog oglasa objavljenog 2008. godine i Javnog oglasa iz 2009. godine, obuku je do sada uspješno završilo 1405 kandidata, od kojih su 93 žene i oni se danas nalaze u sastavu operativnih jedinica Oružanih snaga BiH. Prijemom u Oružane snage BiH, mladim vojnicima pruža niz mogućnosti za dugogodišnji angažman u Oružanim snagama Bosne i Hercegovine, a Ministarstvo odbrane i Oružane snage BiH približavaju se NATO standardima o prosječnoj starosti vojnika u oružanim snagama. Istovremeno zamjenjuje se dosadašnji personal, kojem, zbog nužnosti primjene zakonskih rješenja u oblasti odbrane, Ugovori o službi u OS BiH ne mogu biti produženi.**



Rješenja za pripadnike OS BiH koji se nalaze u procesu tranzicije se traže unutar realnih pretpostavki i mogućnosti, a u saradnji i podršku institucija Bosne i Hercegovine, prvenstveno Parlamentarne skupštine BiH, Predsjedništva BiH, Vijeća ministara BiH i Zajedničke komisije za odbranu i sigurnost PS BiH. Preduzete su mjere i aktivnosti na smanjenju ukupnog broja lica kojima ističu ugovori, i to popunom upražnjenih formacijskih pozicija nastalih procesom penzionisanja, prekatégorizacijom vojnika u civilna lica i podoficire i podoficira u oficire i produženjem ugovora o vojnoj službi za pojedine kritične vojno-evidencione specijalnosti. Ministar odbrane BiH je, na prijedlog Načelnika Zajedničkog štaba OS BiH, produžio ugovore za 1 451 vojnika na 3,5 mjeseca, radi održavanja operativne sposobnosti i propisane nacionalne strukture OS BiH, a u skladu sa članom 104. Zakona o službi u OS BiH („Službeni glasnik BiH”,

br. 88/05, 53/07 i 59/09 ). Međutim i dalje ostaje značajan broj pripadnika OS BiH koji će morati napustiti OS BiH i za koje će biti neophodno pružiti asistenciju. Ministarstvo odbrane BiH razvija Program tranzicije i zbrinjavanja otpuštenog personala MO i OS BiH pod nazivom „Perspektiva”, sa ciljem implementacije projekata pomoći radi što lakše reintegracije otpuštenog personala u civilni život. Program predstavlja cjelovit, stručan i efikasan sistem mjera i aktivnosti kojima se otpuštenom personalu osigurava jedinstvena institucionalna podrška i omogućava savjetodavna, edukacijska i druga stručna pomoć i podrška. Programom nisu predviđene novčane otpremnine, izuzev zakonskog prava na novčanu naknadu po osnovu nezaposlenosti od strane nadležnih zavoda za zapošljavanje.

Ministarstvo odbrane BiH je 28.02.2010. godine prekinulo vojnu službu sa 310 vojnika, a dana 25.02.2010. sa istima održane jednodnevne tranzicijske radionice u Sarajevu, Banja Luci, Tuzli i Čapljini na kojima je prisustvovalo oko 280 vojnika. Registracijska dokumenta za učešće u programu „Perspektiva“ do sada je preuzelo 200 lica, a 160 lica se već registriralo. Prekid vojne službe sa 18.06.2010. godine planira se za 600 vojnika, 31.08.2010. godine planiran je prekid vojne službe sa 459 vojnika, a sa 31.12.2010. godine planiran je prekid vojne službe za još 459 vojnika, što znači da će ukupno u 2010. godini biće prekinuta služba sa 1.828 vojnika.



MO BiH je od 20.04.2010. do 13.05.2010. godine na 23 lokacije OS BiH realiziralo jednodnevne tranzicijske radionice sa svom vojnicima koji su u tranziciji u 2010. godini. Ostalim vojnicima starijim od zakonom predviđenih uvjeta vojna služba će biti prekinuta u narednim godinama.

Svim procesima tranzicije i otpusta u 2010. godini rukovodi Tim za tranziciju personala u MO i OS BiH. Proces se odvija po Dinamičkom planu prekida vojne službe vojnicima u OS BiH i u saglasnosti je sa dinamikom prijema na službu mladih vojnika, jer se do 01.01. 2011. godine planira prijem ukupno 1200 mladih vojnika u OS BiH. U toku 2010. godine Ministarstva odbrane BiH uputilo je pismo Agenciji za rad i zapošljavanje BiH, Federalnom zavodu za zapošljavanje, Zavodu za zapošljavanje Republike Srpske i Zavodu za zapošljavanje Brčko Distrikta za pomoć i podršku aktivnostima MO i OS BiH u oblasti tranzicije i zbrinjavanja vojnog personala. Također, upućeno je pismo načelnicima svih općina u BiH za pomoć i podršku aktivnostima MO i OS BiH u oblasti tranzicije i zbrinjavanja vojnog personala, a do sada 19 općina se izjasnilo da podržavaju mjere i aktivnosti MO BiH i stavljaju se na raspolaganje za pomoć u budućim projektima podrške otpuštenim licima. Ministarstvo odbrane je u kontaktu i sa 67 zaštitarskih agencija u BiH, 7 sigurnosnih organizacija u BiH i 2 entitetske uprave civilne zaštite od kojih se očekuje pomoć i podrška ovim aktivnostima. Isto tako, nekoliko drugih

institucija ponudilo je pomoć u oblasti tranzicije i zbrinjavanja vojnog personala – (Univerzitet Aperić, Eko-Klek – Zavidovići, Šume Federacije BiH, Rašmer d.o.o). Odsjek za tranziciju personala i Regionalni tranzicijski centri uspostavili su i široku mrežu podrške sa institucijama lokalnog nivoa, razvojnim agencijama, nevladinim organizacijama, privrednim, obrazovnim, kulturnim i drugim subjektima na teritoriji BiH, te potencijalnim donatorima sa ciljem osiguranja pomoći i podrške za buduće projekte zbrinjavanja personala.


Ministarstvo odbrane BiH i dalje radi na iznalaženju dodatnih vidova asistencije našim vojnicima i otvoreno je za sve prijedloge i rješenja koji korespondiraju sa postojećim zakonskim rješenjima i opredjeljenima Bosne i Hercegovine prema euro-atlantskim integracijama. Također, Ministarstvo odbrane BiH planiralo je u budžetu za 2010. godinu sredstva za zbrinjavanje vojnih lica u

procesu tranzicije u iznosu od milion konvertibilnih maraka, a za očekivati je da se ista suma planira i za naredne dvije godine (ukupno 1,5 miliona eura).

Zatražena su i očekuju se sredstva, podrška i pomoć zemalja NATO-a, Evropske komisije i drugih potencijalnih donatora, koji bi uspostavom novog povjereničkog NATO Trust Fonda za BiH doprinijeli generiranju prihoda za otpušteni vojni personal.

Uspostava novog NATO Trust Fond se očekuje do kraja maja 2010. godine, a svoju pomoć su najavili Norveška, Danska, Finska, Švedska, Holandija, Austrija, Italija, Ujedinjeno Kraljevstvo, te SAD. Potrebno je na trogodišnjoj osnovi prikupiti što više finansijskih sredstava (iz donacija minimalno 3.335.000, maksimalno 7.200.000 eura), što uz sredstva MO BiH, stvara realne osnove da se realizira uspješan NTF II, odnosno da se osigura održiva reintegracija otpuštenih lica u civilni život.

Uspostavom NTF II Bosna i Hercegovina i NATO bi osigurali kontinuitet zajedničkog djelovanja, saradnje i vođenja reforme odbrambenog sistema do punopravnog članstva BiH u NATO-u i Evropskoj uniji.



# INTERVJU SA KOMANDANTOM NATO ŠTABA U SARAJEVU BRIGADNIM GENERALOM JOHN BULLARD-OM

*Pristupanje NATO-u predstavlja proces zasnovan na izvršavanju obaveza i dužnosti, a odgovornost je na političkim liderima Bosne i Hercegovine da ovaj proces olakšaju*

**Šta za Bosnu i Hercegovinu znači uslovni poziv za pristupanje MAP-u?**

Dana 22. aprila na sastanku ministara u Tallinn-u, ministri spoljnih poslova NATO-a su odobrili «uslovni» status Bosni i Hercegovini za pristupanje MAP-u. Uslov je rješenje pitanja vojne imovine. NATO odobrava najznačajnije reforme odbrane, koje je BiH postigla, kao i napredak posljednjih nekoliko mjeseci u ključnim pitanjima, kao što su uništavanje viška naoružanja i municije, međutim, rješavanje vlasništva vojne imovine je bitno da bi se dozvolilo potpuno funkcionisanje državnih vojnih snaga i na taj način obezbjedilo «aktiviran» ponude za članstvo u MAP, koje je usko povezano sa ovim rješavanjem.

**MAP će se odvijati u nekoliko godišnjih ciklusa, a zadaća prvog ciklusa je izrada godišnjeg programa. Možete li nam reći šta podrazumijeva taj dokument?**

Jezgro MAP-a je Godišnji Nacionalni Plan (ANP), kojim se utvrđuju ciljevi, mehanizmi i raspored rada za poslove, koji su od bitnog značaja da BiH postane vjerodostojan kandidat za ulazak u NATO. ANP, kojeg razvijaju kandidatske zemlje u dogovoru sa NATO-om, je dizajniran za rješavanje identifikovanih prioriteta u zemlji. Svaki ANP pokriva pitanja u nekoliko kategorija, poput Individualnog partnerskog plana, u kojem BiH već učestvuje: političko ekonomska, odbrambeno/vojna, pitanja resursa, sigurnosna i pravna. NATO daje savjete i potporu državi kroz razne mehanizme i postoji stalna razmjena informacija.

Potrebno je dostaviti konsolidovani izvještaj o napretku svake godine, a kandidatske zemlje se sastaju sa NATO saveznicima da bi diskutovali o ovim izvještajima i da bi primili povratnu informaciju od saveznika. MAP nije mjerilo za prijem u članstvo, već mehanizam, putem kojeg se zemlja može pripremiti za članstvo. Odluka za početak pristupnih pregovora s NATO saveznicima još uvijek traje.

**Kakvo je vaše mišljenje vezano za ispunjenje uslova, tj. da li će BiH ispuniti uslov da do septembra ove godine riješi pitanje perspektivne vojne imovine?**

Bosna i Hercegovina godinama radi na punopravnom članstvu u NATO kroz programe Partnerstvo za mir. To pokazuje da postoji dugoročno političko opredjeljenje i konsenzus u cijeloj zemlji. BiH bi mogla ispuniti uslove, koje je NATO tražio za pokretanje MAP-a, rješavanjem pitanja nepokretne vojne imovine, tako da se MAP može aktivirati prema rasporedu prvog Godišnjeg nacionalnog plana u septembru. Odgovornost je na političkim vojnim liderima.

**Ukoliko BiH ne riješi pitanje perspektivne vojne imovine, kakva je dalja sudbina podnošenja Godišnjeg nacionalnog programa?**

Normalan period Godišnjeg nacionalnog plana je od septembra do juna. Mi dajemo podršku BiH u rješavanju nepokretne vojne imovine prije septembra, kako bi se olakšalo pristupanje MAP-u zajedno sa Crnom Gorom. Vrlo je važno zadržati zamah za ulazak u MAP ciklus u septembru 2010. godine i ne zakasnuti sa pristupom najkasnije do septembra 2011. godine.

**Krajem godine je planiran samit u Lisabonu na kojem bi se trebalo razmatrati novi strateški koncept. Šta će biti glavne smjernice tog novog koncepta u smislu budućeg djelovanja NATO saveza, te kakav značaj će, po Vašem mišljenju, isti imati za regiju Zapadnog Balkana?**

Dana 17. maja grupa stručnjaka, koju je imenovao Generalni sekretar NATO-a Anders Rasmussen s ciljem da postavi temelje novog strateškog koncepta NATO-a, predstavila je svoje prijedloge Sjevernoatlantskom vijeću. Dva temeljna zaključka bila su da je dužnost Saveza da

garantuje za sigurnost svojih članova, što se može postići samo kroz dinamično angažovanje sa zemljama i organizacijama van svojih granica.

U današnjem okruženju pružanje sigurnosti znači preobraziti vojne snage da postanu svestrane, da budu u skladu sa «brzim reagovanjem», sposobne da se nose sa mnoštvom raznih geografskih i tehničkih prijetnji. Grupa stručnjaka je takođe naglasila potrebu za interoperabilnošću i izgradnjom partnerstva sa zemljama, koje nisu članice NATO-a, naročito Rusija.

Možemo nagađati da će ovaj pristup za Zapadni Balkan davati veći naglasak na regionalnoj saradnji i regionalnoj integraciji vojnih i sigurnosnih snaga. Akcenat na «lakši», svestraniji i vojno-spremniiji može doprinijeti da manje zemlje, poput BiH, kao pružaoci odgovarajućih kvalifikacija, dobiju značajniju ulogu unutar Saveza. Naglasak na izgradnji partnerstva sa Rusijom može pomoći u izgradnji progresivnog konsenzusa o članstvu u NATO-u i sigurnost unutar Srbije, Republike Srpske i širom Zapadnog Balkana.

**Možete li nam reći vašu procjenu koliko će godina BiH ostati u MAP-u, odnosno za koliko godina može postati punopravna članica NATO saveza?**

Pristupanje NATO-u predstavlja proces, zasnovan na izvršavanju obaveza i dužnosti, a odgovornost je na političkim liderima Bosne i Hercegovine da ovaj proces olakšaju. NATO nikada ne određuje datume ili rokove, jer progres zavisi od dinamike izvršenja. Ono što je



Bosna i Hercegovina postigla da bi ispunila očekivanja saveznika je ključni faktor za konačnu političku odluku. Uspješno rješenje pitanja vlasništva vojne imovine će svakako biti zapaženo od strane Saveznika, a time i omogućeno uvođenje MAP-a prema rasporedu u septembru.

**Jeste li zadovoljni trenutnim sposobnostima Oružanih snaga BiH?**

Oružane snage BiH treba da se ponose načinom na kojem su uspjeli da izvedu proces velike promjene i reformu i što su zadržale operativnu sposobnost. Sadašnje Oružane snage BiH su nedavno formirane. Sveobuhvatni proces reforme odbrane je u toku već sedam godina i svi napori lidera odbrane su usmjereni na sprovođenju reformi i novih vojnih struktura. Gotovo dvije trećine vojnih jedinica osnovane su na novim lokacijama sa novim personalom. Trenutno se radi na poboljšanju odbrambenih sposobnosti unutar procesa NATO planiranja i revizije. Upečatljivo je to da, dok se sav taj proces odvijao, Oružane snage BiH su u periodu od četiri i po godine uputile jedinicu za uništavanje neeksplozivnih ubojnih sredstava i pješadijsku jedinicu u Irak. Štaviše, pješadijske, vojne i policijske jedinice su sada potpuno spremne za Afganistan, da se pridruže deseterici stabilnih oficira Bosne i Hercegovine, koji se već tamo nalaze. Ovo je respektabilan trud. Operativne sposobnosti Oružanih snaga će nastaviti da se poboljšavaju kroz proces revizije odbrane, time što su izvori prilagođeni mogućnostima, što je oprema modernizovana, i što je poboljšana starosna i rang struktura Oružanih snaga. Sadašnja struktura Oružanih snaga BiH predstavlja dobar temelj za usaglašavanje sa NATO snagama. Naredna poboljšanja će se odvijati u okviru PFP procesa planiranja i revizije i MAP-a. Treba razvijati sveobuhvatni sistem upravljanja personalom, što će poboljšati kvalitet personala Oružanih snaga, koji su obučeni i sposobni za izvršenje mnogih kompleksnih zadataka i misija, koje se traže od moderne vojne sile. Ostali sistemi će takođe trebati vremenom da se unaprijede da bi se osiguralo da Oružane snage imaju resurse, potrebne za pravilno obučeni i opremljen rad, na način kompatibilan sa multi-nacionalnim operacijama, koje sprovodi NATO. To će uključivati racionalizaciju i modernizaciju sadašnje strukture unutar konteksta revizije misija i sposobnosti. To takođe može uključivati razvoj sposobnosti, koja će se koristiti u okviru NATO/PfP i mirovnim operacijama.

**Kako ocjenjujete saradnju NATO štaba u Sarajevu sa MO BiH i OS BiH, gdje vidite mogućnosti bolje saradnje?**

Imamo odlične odnose s Ministarstvom odbrane i Oružanim snagama BiH. Naš savjetnički tim se nalazi u zgradi Ministarstva odbrane, pa je osoblje BiH i NATO-a u stalnoj interakciji. Imamo zajedničke ciljeve, definisane od strane PFP programa, u kojima BiH učestvuje. Imamo česte, otvorene i profesionalne razgovore o tome kako da ostvarimo te ciljeve, a savjetnički tim NATO-a radi sa kolegama na svim nivoima, kako bi se implementirali dogovoreni planovi.

Članstvo u NATO je više od Ministarstva odbrane i Oružanih snaga; stoga mi radimo i s drugim institucijama poput Ministarstva vanjskih poslova i Ministarstva sigurnosti, Parlamentarne skupštine BiH, te NATO koordinacijskog tima Vijeća ministara BiH. Ova saradnja će se pojačati kako BiH bude nastavljala sa radom na svojim zahtjevima za pristup u NATO.

**Jeste li zadovoljni podrškom koju javnost Bosne i Hercegovine daje integracijama za članstvo u NATO?**

Na sastancima s ljudima širom Bosne i Hercegovine naišli smo na rasprostranjenu podršku članstvu u NATO, što je vrlo ohrabrujuće. Tačno je da su mišljenja o NATO-u vrlo često definirana na osnovu etničnosti i još uvijek prisutnim osjećajima iz rata. S obzirom na skoriju prošlost ove regije, mnogi ljudi NATO doživljavaju samo kao vojni savez. Od završetka Hladnog rata, civilni i politički aspekti u NATO-u su od izuzetne važnosti. NATO je sada sredstvo za jačanje liberalnih i demokratskih vrijednosti, te dobrog upravljanja. Dokazano je da članstvo u NATO-u stvara ekonomski napredak, a članstvo u NATO-u je postalo i ulaz u Evropsku uniju. Zajedno s Ministarstvom odbrane i Oružanim snagama BiH, NATO štab u Sarajevu više od četiri godine provodi vrlo aktivnu kampanju komunikacije i dijaloga s ljudima širom BiH. Rezultat toga je sve veće priznanje u cijeloj BiH da NATO nije isključivo vojni savez, nego sredstvo za poboljšanje cijele zemlje i kretanje iste prema punopravnim integracijama u zajednicu evropskih naroda. Naše iskustvo jeste da su ljudi iz RS-a, koji su u početku bili skeptični kad je u pitanju članstvo u NATO, sve više zainteresirani za NATO. Oni žele saznati na koji način im priključenje u NATO može koristiti. Postoji sve veća spremnost da se podrži priključenje u NATO u smislu pružanja stabilne i sigurne budućnosti s više mogućnosti.

**Možete li nam reći Vašu procjenu regionalne suradnje i suradnje oružanih snaga u regiji?**

Ministar odbrane i Načelnik Zajedničkog štaba OS BiH vjeruju da je regionalna saradnja vrlo važna i oni su učinili mnogo napora kad je o tom riječ. Kao dodatak razmjeni informacija i ideja na bilateralnoj osnovi, BiH je također član Jadranske povelje, koja pruža forum za kooperaciju o pitanjima od zajedničkog interesa za BiH i njene četiri regionalne susjedne zemlje i SAD. Euro-atlantsko partnersko vijeće NATO-a, sastavljeno od svih NATO saveznika i članica PfP, nudi širi forum u kojem se može raspravljati o regionalnim pitanjima. Također, PSOTC (Centar za obuku za operacije podrške miru) nudi odlične regionalne mogućnosti. BiH je također imala koristi od razmjene informacija sa NATO saveznicama iz regije, posebno kada je riječ o praktičnim aspektima NATO integracija. Saradnja među zemljama regije će se nastaviti povećavati kako se bude povećavao napredak prema članstvu u NATO i Evropsku uniju, u skladu sa izborima suverene vanjske politike svake zemlje.

Januar  
12  
2010

## CEREMONIJA DODJELE MEDALJA PRIPADNICIMA ORUŽANIH SNAGA BiH ZA POSTIGNUĆE U OPERACIJI "IRAČKA SLOBODA"

U Domu Oružanih snaga Bosne i Hercegovine 12. januara 2010. godine upriličena je ceremonija dodjele medalja za 48 pripadnika Oružanih snaga BiH za postignuća u Operaciji "Iračka sloboda". Na ceremoniji su prisustvovali predstavnici Oružanih snaga BiH na čelu sa zamjenikom načelnika Zajedničkog štaba OS BiH, general-majorom Rizvom Plehom, te predstavnici Ambasade SAD-a u BiH.

Na ceremoniji se prisutnima obratio otpravnik poslova Ambasade SAD-a u BiH, gospodin Jonathan M. Moore, koji je čestitao dobitnicima medalja i istakao kako treba da budu ponosni na svoj doprinos Operaciji "Iračka sloboda".

Prisutnima se obratio i zamjenik načelnika Zajedničkog štaba OS BiH, general-major Rizvo Pleh, koji je naglasio kako su svi, a posebno odlikovani pripadnici Oružanih snaga koji su učestvovali u Operaciji "Iračka sloboda" najbolji ambasadori Bosne i Hercegovine u svijetu.



Januar  
26  
2010

## ZAMJENICA MINISTRA ODBRANE BiH PRIMILA U POSJETU DRŽAVNOG SEKRETARA REPUBLIKE MAĐARSKE

Zamjenica ministra odbrane Bosne i Hercegovine, gospođa Marina Pendeš, je 26. januara 2010. godine primila u posjetu državnog sekretara Republike Mađarske, dr. Agnes Vadai sa njenim saradnicima. Zamjenica Pendeš

je dr. Vadai zahvalila na posjeti, te istakla kako su Ministarstvo odbrane i Oružane snage BiH u proteklim godinama ostvarile veoma uspješnu saradnju sa Republikom Mađarskom, naglasivši posebno značajnu finansijsku podršku i podršku vezanu za obuku i obrazovanje koje je R. Mađarska pružila BiH. Takođe, zamjenica Pendeš je ukratko dr. Vadai upoznala o učešću Oružanih snaga BiH u mirovnim misijama, te o putu Bosne i Hercegovine ka priključenju u NATO i EU. Nakon radnog sastanka, zamjenica Pendeš i dr. Vadai su sa svojim delegacijama obišle znamenitosti gradova Sarajeva i Mostara, a 28. 01. su sa svojim delegacijama položile vijence u memorijalnom centru "Potočari" u Srebrenici.



Januar  
20  
2010

## POSJETA MINISTRA ODBRANE KRALJEVINE HOLANDIJE MINISTARSTVU ODBRANE BiH

Zamjenica ministra odbrane Bosne i Hercegovine, gospođa Marina Pendeš je 20. januara 2010. godine primila u posjetu ministra odbrane Kraljevine Holandije, gospodina Eimerta van Middelkoopa, vojnog atašea i ambasadoricu K. Holandije u BiH.

Zamjenica Pendeš je poželjela dobrodošlicu ministru van Middelkoopu u Ministarstvo odbrane BiH, te ga ukratko upoznala sa najvažnijim trenutnim pitanjima u MO i OS BiH, kao što su pitanja perspektivne i neperspektivne imovine, tranzicija vojnog personala OS BiH, učešće OS BiH u misiji ISAF, te put ka punopravnom članstvu u NATO Savez i EU.

Takođe, zamjenica Pendeš se zahvalila na dosadašnjoj veoma uspješnoj saradnji između Ministarstva odbrane K. Holandije i Ministarstva odbrane BiH, te naglasila kako je K. Holandija u proteklim godinama uveliko pomogla Ministarstvu odbrane i Oružanim snagama BiH i to putem finansijske podrške i doniranju opreme, te u oblasti obrazovanja i obuke.

Ministar odbrane K. Holandije, gospodin Eimert van Middelkoop je pohvalio napredak Ministarstva odbrane i Oružanih snaga BiH, kao i cijelu BiH, na putu ka članstvu u NATO, te istakao kako će MO K. Holandije i dalje pružati pomoć Ministarstvu odbrane BiH i državi u cjelini, te nastaviti uspješnu saradnju sa Ministarstvom odbrane BiH.



Januar  
27  
2010

## MINISTAR ODBRANE BiH DR. SELMO CIKOTIĆ RAZGOVARAO SA MINISTROM ODBRANE REPUBLIKE ČEŠKE MARTINOM BARAKOM

Ministar odbrane BiH dr. Selmo Cikotić, razgovarao je u Pragu sa ministrom odbrane Republike Češke Martinom Barakom, za vrijeme trajanja konferencije "Provincijski rekonstrukcijski timovi - Šta je sljedeće- Izazovi rekonstrukcije u Avganistanu," koja se od 25. do 27. januara 2010. godine održavala u Pragu.

Razgovaralo se o bilateralnoj saradnji Ministarstva odbrane BiH i Ministarstva odbrane Republike Češke, kao i mogućnostima njenog unaprijeđenja u narednom periodu.

Također, razgovaralo se o učešću OS Republike Češke u operaciji ISAF u Afganistanu, te o mogućem učešću OS BiH u ovoj misiji. Tokom boravka u Republici Češkoj, ministar odbrane posjetio je i Ambasadu BiH u Pragu, gdje ga je otpravnik poslova gospodin Slobodan Srdanović upoznao sa aktivnostima Ambasade BiH u Pragu.



mart  
22  
2010

### ZAMJENICA MINISTRA ODBRANE BiH NA SASTANKU U NATO ŠTABU U BRISELU – POVJERENIČKI FOND ZA VOJNIKE KOJI ĆE BITI OTPUŠTAJU

Zamjenica ministra odbrane BiH Marina Pendeš susrela se 25.03.2010. godine u Briselu sa zvaničnicima NATO štaba i predstavnicima jednog broja NATO i PfP zemalja, sa kojima je razgovarala o mogućnostima uspostavljanja novog NATO povjereničkog fonda koji bi služio za pomoć vojnicima koji se otpuštaju u narednom periodu zbog ograničenja starosne dobi. Ovaj sastanak je predstavljao nastavak šire i kontinuirane aktivnosti zvaničnika BiH i pripadnika Misije BiH pri NATO, nakon pisma koje je ministar odbrane BiH dr. Selmo Cikotić uputio Generalnom sekretaru NATO prošle godine sa molbom da se pomogne BiH u procesu otpusta personala u OS BiH. Asistencija se traži za ukupno 3300 osoba, koji će napustiti Oružane snage BiH u naredne dvije godine. Zamjenica ministra odbrane Marina Pendeš je naglasila čvrstu opredijeljenost za nastavak puta BiH prema NATO i implementaciji zakonske odredbe prema kojoj je starosna dob vojnika za službu u Oružanim snagama BiH 35 godina. Također, istaknuta je namjera da se otpuštenim vojnicima pruži pomoć u skladu sa mogućnostima Ministarstva odbrane BiH i u saradnji sa drugim institucijama na entitetskim i opštinskim nivoima. U tom pravcu se već provode određene aktivnosti, a na raspolaganju su i određena, za sada, skromna finansijska sredstva. Predstavnici NATO i PfP zemalja su dali podršku ovom projektu, i iskazali dobru volju da se pruži pomoć. Jedan broj zemalja već ranije je dao obećanja da će pomoći ovu aktivnost sa određenim finansijskim sredstvima. Takođe, predstavnici nekih zemalja su iznijeli stav da se ispituju mogućnosti učestvovanja u ovom, nadasve humanom fondu, dok su predstavnici jednog broja zemalja iznijeli stav da, zbog aktuelne finansijske krize u toku ove godine, neće biti u mogućnosti da učestvuju u ovom projektu.

mart  
30  
2010

### MINISTAR ODBRANE BiH DR. SELMO CIKOTIĆ RAZGOVARAO SA MINISTROM ODBRANE SR NJEMAČKE dr. KARL-THEODOR FREIHERR ZU GUTTENBERG-OM



U Ministarstvu odbrane BiH u Sarajevu 30. 03. 2010. godine održan je sastanak delegacija Ministarstva odbrane SR Njemačke i Ministarstva odbrane BiH, koje su predvodili ministri dr. Karl

Theodor Freiherr zu Guttenberg i dr. Selmo Cikotić. Razgovarano je o naporima BiH i Ministarstva odbrane BiH za što brže i kvalitetnije integracije u NATO i EU, ispunjavanju uslova za priključenje BiH članstvu u MAP, angažmanu Oružanih snaga BiH u operaciji ISAF u Afganistanu, te o bilateralnoj saradnji



Ministarstva odbrane BiH i Ministarstva odbrane SR Njemačke. Ministar odbrane Selmo Cikotić zahvalio se na dosadašnjoj pomoći SR Njemačke i Oružanih snaga SR Njemačke,

koja se odvijala kroz široku bilateralnu saradnju između dva ministarstva i manifestovala se kroz implementiranje različitih programa pomoći Ministarstvu odbrane i Oružanim snagama BiH, a posebno za učešće pripadnika Oružanih snaga Njemačke u misiji EUFOR-a u BiH. Ministar Cikotić je naglasio da Njemačka ohrabruje napredak BiH prema NATO-u, uz insistiranje na ispunjavanju kriterija koje Bosna i Hercegovina treba ispuniti kako bi dobila status MAP-a. "Značajno je da se održi zamah prema NATO-u, kao noseći mehanizam napretka BiH prema evroatlantskim integracijama u cjelini," istakao je ministar Cikotić. Ministar odbrane SR Njemačke Karl Theodor Freiherr zu Guttenberg istakao je važnost učešća OS BiH u operacijama podrške miru i izrazio očekivanja da se angažman Oružanih snaga BiH nastavi i u operaciji ISAF u Afganistanu. On je naglasio da Njemačka i BiH imaju vrlo dobre odnose, a da Njemačka podržava napore koje BiH ulaže na putu ka EU i NATO-u: "Koraci postignuti u vojnom sektoru su ohrabrujući, a i drugi bi se trebali ugledati na ono što je učinjeno u odbrambenom sektoru i nastaviti ispunjavati uslove međunarodne zajednice," istakao je na kraju ministar Guttenberg.

Razgovorima u Ministarstvu odbrane BiH prisustvovao je i ambasador SR Njemačke u BiH

NJ. E. Joachim Schmidt, a u delegaciji Ministarstva odbrane BiH nalazili su se zamjenik ministra za politiku i planove Živko Marjanac, zamjenica ministra za upravljanje personalom Marina Pendeš, te zamjenik načelnika Zajedničkog štaba OS BiH za operacije general-major Rizvo Pleh.

april  
08  
2010

## POTPISAN UGOVOR IZMEĐU BOSNE I HERCEGOVINE I SVETE STOLICE O DUŠOBRIZNIŠTVU KATOLIČKIH VJERNIKA PRIPADNIKA ORUŽANIH SNAGA BIH



U Domu OS BiH u Sarajevu 08. 04. 2010. godine potpisan je Ugovor između Bosne i Hercegovine i Svete Stolice o dušobrizništvu katoličkih vjernika pripadnika Oružanih snaga BiH. Ugovor su potpisali ministar odbrane dr. Selmo Cikotić ispred Bosne i Hercegovine, a u ime Svete Stolice Ugovor je potpisao apostolski nuncij u Bosni i Hercegovini nadbiskup Alessandro D'Errico.

Svečanoj ceremoniji potpisivanja prisustvovali su predstavnici Parlamentarne skupštine BiH, Zajedničke parlamentarne komisije BiH za odbranu i sigurnost, Zajedničke parlamentarne komisije BiH za ljudska prava, Vijeća ministara BiH, predstavnici biskupija, crkava i vjerskih zajednica u BiH, Ured Visokog predstavnika, predstavnici NATO štaba u Sarajevu i EUFOR-a, te najviši dužnosnici Ministarstva odbrane i Zajedničkog štaba

OS BiH. Ministar odbrane Selmo Cikotić istakao je da je potpisivanje Ugovora između Bosne i Hercegovine i Svete Stolice o dušobrizništvu katoličkih vjernika, pripadnika Oružanih snaga Bosne i Hercegovine značajan događaj za Ministarstvo odbrane i Oružane snage Bosne i Hercegovine, ali i za Bosnu i Hercegovinu u cjelini. Na Oružane snage to znači „konkretizaciju odredaba Temelnog ugovora u praksi, uspostavljanjem Vojnog ordinarija, kvalitetniju dušobrizničku skrb katoličkih vjernika, pripadnika OS BiH, doprinos OS BiH unaprijeđenju ljudskih (vjerskih) prava po uzoru i ugledu na najrazvijenije demokratske zemlje, razvoj svestrane saradnje i razumijevanja sa Svetom Stolicom, koja je u najtežim vremenima za BiH pružala izuzetnu podršku“, te kako je ministar Cikotić naglasio „razvoj saradnje i razumijevanja između institucija odbrane i institucija katoličke crkve u BiH i između crkava i vjerskih zajednica u BiH.“ Apostolski nuncij u Bosni i Hercegovini nadbiskup Alessandro D'Errico, izrazivši svoje zadovoljstvo potpisivanjem Ugovora, naglasio je da se „ovim Ugovorom ne traže privilegije, ali se traži da ono što se dogovori za Katoličku Zajednicu bude ugovoreno i sa drugim zajednicama. „Razlozi ovog zahtjeva,“ kako je istakao nadbiskup Alessandro D'Errico, su „vrlo jednostavni: iznad svega načelo jednakosti konstitutivnih naroda i vjerskih zajednica koje su dio Međureligijskog vijeća i jer vjerujemo u ekumenski i međureligijski dijalog i u potrebu harmonije među vjerskim zajednicama.“ Ugovor o dušobrizništvu katoličkih vjernika pripadnika Oružanih snaga BiH u narednom periodu treba da bude ratifikovan u Parlamentu BiH.

april  
08  
2010

## OBILJEŽAVANJE 5. GODIŠNICE PRVOG PJEŠADIJSKOG (GARDIJSKOG) PUKA OS BIH I 18. GODIŠNICE HVO-A

Dana 09. aprila 2010. godine u kasarni „Mato Lučić Maturica“ u Kiseljaku je održana središnja svečanost obilježavanja 18. godišnjice HVO-a i 5. godišnjice 1. pješadijske gardijske pukovnije. Ovoj svečanosti prisustvovali su zamjenica ministra odbrane gđa Marina Pendeš, ministar odbrane dr. Selmo Cikotić, ostali predstavnici Ministarstva odbrane i Oružanih snaga BiH, kao i brojne visoke vojne i civilne delegacije, crkveni velikodostojnici, predstavnici udruga iz Domovinskog rata, međunarodne delegacije, te drugi ugledni gosti. Smotru pukovnije izvršila je zamjenica ministra odbrane gđa Marina Pendeš kojoj je raport predao komandant 1. pješadijske gardijske pukovnije brigadir Slaven Lasić. Prigodnim riječima obratili su se zamjenica ministra odbrane Marina Pendeš i komandant Prve pješadijske gardijske pukovnije brigadir Slaven Lasić. Zamjenica Pendeš je u svom obraćanju zahvalila svim prisutnima koji su zajedno s pripadnicima MO i OS BiH došli proslaviti obilježavanje 5. godišnjice Prvog pješadijskog (Gardijskog) puka OS BiH i 18. godišnjice HVO-a, te istakla: „Napredak koji su OS BiH učinile u svojoj reformi potvrda je opredjeljenosti BiH za prihvaćanje zajedničkih vrijednosti u smislu demokracije, zaštite ljudskih prava i vladavine zakona na zacrtanom ali sigurnom putu ka evroatlantskim integracijama“. Brigadir Lasić je sve okupljene na središnjoj svečanosti kratko upoznao s nastankom i djelovanjem HVO-a i 1. pješadijskog puka OS BiH, te istakao kolika je važnost sve tri pukovnije u procesu reforme odbrane.



januar  
28  
2010

# BILATERALNI RAZGOVORI MINISTARSTVA ODBRANE BiH I MINISTARSTVA ODBRANE SAD

Delegacije ministarstava odbrane BiH i SAD razgovarale su 29. 01. 2010. godine u Sarajevu o aspektima bilateralnih odnosa dviju zemalja u oblasti odbrane. Delegaciju MO BiH predvodio je ministar Selmo Cikotić, a MO SAD zamjenik pomoćnika Državnog sekretara za odbranu SAD Joseph McMillan. Glavne teme razgovora bile su status Pregleda odbrane i prioriteti odbrambenih reformi, naponi NATO-a u odbrambenim reformama u BiH, saradnja i projekti sa Američkom komandom za Evropu i Nacionalnom gardom Marylanda, te aplikacija BiH za MAP. Razgovorima su prisustvovala i delegacije Američke komande za Evropu (US EUCOM) i Nacionalne garde Merilenda, komandant NATO štaba u Sarajevu brigadni general John Bullard i predstavnici Ambasade SAD-a u Bosni i Hercegovini.

Sjedinjene Američke Države (SAD) su opredijeljenje za nastavak saradnje s BiH, a pružanje podrške BiH mirovnim misijama dokaz je da ova zemlja može mnogo doprinijeti međunarodnom miru i stabilnosti, istakao je zamjenik pomoćnika Državnog sekretara za odbranu Joseph McMillan u svojoj izjavi za medije upriličenoj nakon završenih razgovora dviju delegacija.

Zamjenik pomoćnika Državnog sekretara za odbranu SAD Joseph McMillan kazao je da SAD ostaju opredijeljene da rade na unaprijeđenju partnerstva sa BiH.

„Zahvalili smo ministru Cikotiću i bh. liderima za njihovu uspješnu podršku međunarodnim mirovnim misijama, što je dokaz da BiH može doprinijeti međunarodnom miru i stabilnosti. Razgovarali smo i o nastavku američke podrške razvoju i modernizaciji OS BiH“, rekao je McMillan.



sastava, ali i za aktivnosti vezane za članstvo u NATO-u te davanju pomoći u donošenju odluke i razmještanju naše jedinice u okviru ISAF-a u Afganistanu“, kazao je ministar Cikotić. Ministar Cikotić je istakao da je posjeta američke delegacije potvrda vezanosti SAD-a i njihove odlučnosti da i dalje podržavaju odbrambenu reformu i sve napore odbrambenih struktura i BiH u cjelini, u smislu progresa koji se u okviru odbrambenih struktura odvija unutar BiH i na njenom putu prema punopravnom članstvu u NATO.

SAD su obećale i pomoć u rješavanju pitanja viška fosfornog i kasetnog naoružanja, a koje OSBiH još uvijek imaju u svojim skladištima, te u pitanjima nastavka reforme odbrane u cilju priključivanja NATO-u. „Želimo imati više zajedničkih aktivnosti poput vježbe "Združeni napor 2009". S obzirom na uspješnu organizaciju i provedbu ove vježbe, ponudili smo BiH da bude domaćin još jednoj vježbi koja bi bila organizirana 2012. godine“, kazao je McMillan. Ministar odbrane BiH Selmo Cikotić je istakao da su razgovori bili veoma uspješni, ali da oni ne predstavljaju ništa senzacionalno novo.

„Ovi razgovori potvrđuju prisustnost i riješenost SAD-a da održe pozitivne pomake BiH i u završetku aktivnosti koje se odnose na izgradnju funkcionalnog odbrambenog

april  
15  
2010

## CENTRALNA SVEČANOST U POVODU 5. GODIŠNJICE 2. PJEŠADIJSKOG (RENDŽERSKOG) PUKA OS BiH I 18. GODIŠNJICE ARMIIJE R BiH



Dana 15. aprila 2010. godine u kasarni "Adil Bešić" u Bihacu održana je centralna pukovska svečanost u povodu 5. godišnjice 2. pješadijskog (rendžerskog) puka OS BiH i 18. godišnjice Armije R BiH. Na svečanosti su između ostalih prisustvovali dr. Haris Silajdžić, predsjedavajući Predsjedništva BiH, dr. Selmo Cikotić, ministar odbrane BiH, predstavnici MO i OS BiH, predstavnici zakonodavne i izvršne vlasti, vjerskih zajednica, boračkih udruženja, predstavnici međunarodnog diplomatskog kora, kao i brojni drugi građani. Smotru jedinice izvršio je predsjedavajući Predsjedništva BiH, a raport je predao komandant 2. pješadijskog (rendžerskog) puka brigadir Mirsad Begić. Na svečanosti prisutnima su se obratili predsjedavajući Predsjedništva BiH, Ministar odbrane i Komandant 2. pješadijskog puka. Komandant 2. pješadijskog (rendžerskog) puka, prisutne je upoznao sa nastankom i genezom Armije R BiH, kao i misijom 2. pješadijskog puka da njeguje identitet i vojno naslijeđe u okviru OSBiH.

april  
16  
2010

### DELEGACIJA OS BiH U POSJETI ARMIIJI REPUBLIKE MAKEDONIJE

Načelnik Zajedničkog štaba OS BiH general-pukovnik Miladin Milošević predvodio je delegaciju OS BiH koja je na poziv načelnika Generalštaba Armije Republike Makedonije general-potpukovnika Miroslava Stojanovskog boravila u posjeti ovoj zemlji od 13. do 16. 04. 2010. godine.



Makedonije, o učešću u mirovnim misijama, kapacitetima i mogućnostima školovanja na Vojnoj akademiji u Skoplju, kao i iskustvima upotrebe jedinice za uništenje neeksplozivnih ubojnih sredstava i rada Centra za simulacije OS BiH. Načelnik ZŠ OS BiH general Miladin Milošević je, u pratnji domaćina, posjetio Vojno-medicinski centar u Skoplju, Vojnu akademiju Armije Republike Makedonije i poligon Krivolak.



dotadnih unapređenja, posebno na polju uništavanja nestabilne municije i viškova municije i minsko-eksplozivnih sredstava u BiH, učešću u misijama podrške miru, te pomoći u tranziciji u civilni život vojnika koji će tokom ove i narednih godina napustiti OS BiH.

Ministarstvo odbrane BiH će nastaviti raditi sa Ambasdom SAD u Sarajevu na konkretizaciji programa pomoći u navedenim oblastima. U završnici posjete delegacija je posjetila komandu i jedinice Nacionalne garde Maryland-a, savezne države s kojom BiH ima potpisan program partnerstva (State Partnership Program).

april  
16  
2010

### DELEGACIJA MINISTARSTVA ODBRANE BiH U POSJETI SAD

Delegacija Ministarstva odbrane BiH, koju je predvodio zamjenik ministra odbrane za politiku i planove Živko Marjanac, boravila je u posjeti Sjedinjenim Američkim Državama.



Delegaciji MO se u SAD priključio i ambasador BiH u SAD, gospodin Mitar Kujundžić.

I ova posjeta je dio aktivnosti bilateralne saradnje na polju odbrane između SAD i BiH i predstavlja direktan nastavak bilateralnih konsultacija na polju odbrane održanih u Sarajevu u januaru ove godine. Dodatno, tokom posjete delegacija Ministarstva odbrane BiH informisala je administraciju SAD o napretku postignutom u ključnim oblastima prije održavanja neformalnog sastanka ministara vanjskih poslova zemalja članica NATO-a u Tallinn-u (Estonija) 22. i 23. aprila ove godine. Jedna od tema ovog sastanka bila je i razmatranje aplikacije BiH za prijem u MAP, kao stepenik na putu ka punopravnom članstvu u NATO-u. Tokom posjete delegacija u Pentagonu sastala se i sa gospodinom McMillan-om, Prvim zamjenikom pomoćnika Sekretara odbrane SAD, sa kojim je analizirana dosadašnja bilateralnu saradnju i mogućnost

februar  
05  
2010

## SENATORI I KONGRESMENI SAD-A POSJETILI MINISTARSTVO ODBRANE BiH

U Ministarstvu odbrane BiH u Sarajevu 05. 02. 2010. godine održan je sastanak delegacija Kongresa Sjedinjenih američkih država i Ministarstva odbrane i OS BiH. Delegaciju SAD-a predvodili su senatori John McCain, Joseph Lieberman, Saxby Cahmbliss i Mark Udall, a u delegaciji su bili i predstavnici Kongresa Jane Harman, Loretta Sanchez i Jeff Flake. Delegaciju Ministarstva odbrane predvodili su ministar odbrane dr. Selmo Cikotić i zamjenica ministra odbrane Marina Pendeš, te načelnik Zajedničkog štaba OS BiH i zamjenici NZŠ OS BiH.



„Iračka sloboda“ u Iraku i izrazio je očekivanja da će se angažman

Oružanih snaga BiH nastaviti i u operaciji ISAF u Afganistanu. Senator Joseph Lieberman podržao je nastojanja BiH u pravcu priključenja u NATO i EU, naglasivši da je „reforma odbrane svijetli primjer u tom procesu“. Na kraju, ponuđen je nastavak saradnje i pomoć SAD-a Ministarstvu odbrane i Oružanim snagama BiH i u narednom periodu. Razgovorima u Ministarstvu odbrane BiH su prisustvovali ambasador SAD u BiH Charles English i komandant NATO štaba u Sarajevu brigadni general John Bullard sa saradnicima.

Razgovarano je o naporima BiH i Ministarstva odbrane BiH za što brže i kvalitetnije integracije u NATO i EU, te o podršci SAD u pravcu ispunjavanja uslova za priključenje Bosne i Hercegovine članstvu u MAP. U vezi s tim istaknuto je da SAD ostaju strateški partner BiH u reformama odbrane, te da će se pomoć SAD-a nastaviti i u narednom periodu. Ministar odbrane Selmo Cikotić zahvalio se kongresmenima na dosadašnjoj svestranoj pomoći SAD, koja se manifestovala kroz implementiranje različitih programa pomoći Ministarstvu odbrane i Oružanim snagama BiH, istakavši da je odbrambena reforma „uspješna priča zahvaljujući SAD-u.“ Senator John McCain istakao je važnost učešća OS BiH u operaciji



## U DOMU ORUŽANIH SNAGA BiH PREZENTIRAN ZAKON O PARLAMENTARNOM VOJNOM POVJERENIKU BiH

februar  
11  
2010

U Domu Oružanih snaga BiH 11. februara 2010. godine je prezentiran Zakon o parlamentarnom vojnom povjereniku BiH. Prezentaciji su prisustvovali zamjenik ministra odbrane Živko Marjanac, načelnik Zajedničkog štaba OS BiH general-pukovnik Miladin Milojević, te vojni povjerenik Parlamentarne skupštine BiH Boško Šiljegović. Osim predstavnika Ministarstva odbrane i Zajedničkog štaba OS BiH, prezentaciji je prisustvovao i zamjenik komandanta EUFOR-a u BiH, brigadni general Tibor Nagy. Vojni povjerenik Parlamentarne skupštine BiH Boško Šiljegović je posebno naglasio i prisutne upoznao sa značajem, nadležnostima i ulogom parlamentarnog vojnog povjerenika BiH u zaštiti ljudskih prava i sloboda vojnih lica i kadeta u OS BiH. Takođe, vojni povjerenik Boško Šiljegović je istakao dosadašnju uspješnu saradnju sa Generalnim inspektoratom OS BiH, te saradnju sa ombudsmanom BiH u primjeni zakona i zaštiti ljudskih prava. U narednom periodu planiran je i obilazak jedinica Oružanih snaga BiH s ciljem približavanja institucije parlamentarnog vojnog povjerenika BiH svim pripadnicima OS BiH. Postupak uspostavljanja pravnog okvira za rad parlamentarnog vojnog povjerenika Bosne i Hercegovine je okončan 2009. godine usvajanjem Poslovnika o radu i Pravilnika o saradnji s Ministarstvom odbrane i Oružanim snagama Bosne i Hercegovine.



mart  
03  
2010

predvodio predsjedavajući Vijeća ministara BiH Nikola Špirić. U sastavu delegacije, osim ministra Cikotića i predsjedavajućeg Vijeća ministara Nikole Špirića, nalazio se i ministar vanjskih poslova BiH Sven Alkalaj. Sastanak se održavao u okviru priprema za posjetu delegacije NATO-a Bosni i Hercegovini, koja je planirana za kraj marta 2010. godine. Teme razgovora odnosile su se na napredak koji je BiH ostvarila od decembarskog sastanka ministara vanjskih poslova NATO-a, kao i planovima BiH do sastanka Vijeća ministara NATO, koji se održava 22. aprila u Talinu (Estonija).

## MINISTAR ODBRANE BIH SELMO CIKOTIĆ U BRISELU

Ministar odbrane BiH dr. Selmo Cikotić prisustvovao je 03. marta u Briselu razgovorima sa generalnim sekretarom NATO saveza Andersom Fogom Rasmusenom i članovima

Sjevernoatlantskog vijeća NATO-a (NAC), u okviru delegacije Vijeća ministara BiH koju je

mart  
22  
2010

## DELEGACIJA MINISTARSTVA ODBRANE I ORUŽANIH SNAGA BIH U BRISELU

Delegacija Ministarstva odbrane i Oružanih snaga BiH, predvođena zamjenikom ministra za politiku i planove, gospodinom Živkom Marjancem, i zamjenikom načelnika



Zajedničkog štaba OS BiH za operacije, general majorom Rizvom Plehom, boravila je 22.03. 2010. godine u Briselu radi predstavljanja BiH na sastanku Političko-vojnog komiteta NATO-a za Partnerstvo za mir. Tokom sastanka delegacija je odgovarala na pitanja predstavnika 28 zemalja članica NATO-a u vezi s novim setom partnerskih ciljeva za Bosnu i Hercegovinu koji za cilj imaju unapređenje interoperabilnosti i kompatibilnosti OS BiH sa NATO-om. Sastanak kojem su, pored pomenutih predstavnika 28 zemalja članica NATO-a, prisustvovali i predstavnici drugih zainteresovanih partnera, delegacija BiH je iskoristila i za prezentaciju aktivnosti koje su institucije BiH preduzele radi implementacije presude Evropskog suda za ljudska prava u slučaju Sejdić i Finci; nastavku i intenziviranju procesa rješavanja viškova naoružanja, municije i minsko eksplozivnih sredstava OS BiH i procesu upućivanja pripadnika i jedinica OS BiH u misiju Međunarodne bezbjedonosne pomoći (ISAF) u Afganistanu.

Očekivani rezultat sastanka je prihvatanje novog seta partnerskih ciljeva za Bosnu i Hercegovinu, što je bitan dio procesa planiranja i pregleda (PARP) i predstavlja novi korak BiH ka punopravnom članstvu u NATO-u. Nakon neprihvatanja aplikacije Bosne i Hercegovine za članstvo u Akcionom planu za članstvo u NATO-u (MAP) u decembru 2009. godine, procjenjuje se da je neformalni sastanak ministara inostranih poslova zemalja članica NATO u Tallinn-u (Estonija) 22. i 23. aprila ove godine prilika za ponovno razmatranje aplikacije Bosne i Hercegovine za prijem u MAP.

mart  
22  
2010

## POSJETA DELEGACIJE MINISTARSTVA ODBRANE I ORUŽANIH SNAGA BOSNE I HERCEGOVINE MINISTARSTVU ODBRANE REPUBLIKE MAĐARSKE

Delegacija Ministarstva odbrane i

Oružanih snaga Bosne i Hercegovine, koju je predvodila zamjenica ministra odbrane Bosne i Hercegovine Marina Pendeš, boravila je u trodnevnoj službenoj posjeti u Ministarstvu odbrane Republike Mađarske. Domaćin našoj delegaciji bila je državna sekretarica Ministarstva odbrane Republike Mađarske dr. Agnes Vadai. Pored susreta sa civilnim predstavnicima Ministarstva odbrane Republike Mađarske predstavnici MO i OS BiH su razgovarali i sa predstavnicima OS Republike Mađarske. Teme o kojima se razgovaralo bile su dalje jačanje bilateralne saradnje, razmjena iskustava o mirovnim misijama, planovi o otvaranju odbrambenog koledža u BiH, saradnja u području obrazovanja i drugo. Predstavnici obje strane su izrazili zadovoljstvo dosadašnjim vidom saradnje, sa naglašenom željom za dalje proširenje. Zamjenica ministra odbrane BiH, gospođa Pendeš je istakla: "Značaj podrške koju Republika Mađarska konstantno pruža našoj zemlji na putu ka NATO utoliko je veći što R. Mađarska od naredne godine predsjedava EU, a takođe je i članica NATO saveza." Delegacija Ministarstva odbrane i Oružanih snaga Bosne i Hercegovine tokom boravka u Republici Mađarskoj prisustvovala je i Ceremoniji otvaranja muzeja OS R. Mađarske posvećenog učesnicima mirovnih misija.

**SVEČANO OBILJEŽENA 5. GODIŠNJICA**

**3. PJEŠADIJSKOG (REPUBLIKA SRPSKA) PUKA OS BiH  
I 18. GODIŠNJICA VOJSKE RS**

ma  
05  
2010



Centralna svečanost u povodu obilježavanja 18. godišnjice osnivanja Vojske Republike Srpske i 5. godišnjice 3. pješadijskog (Republika Srpska) puka Oružanih snaga Bosne i Hercegovine održana je 12. maja 2010. godine u kasarni „Kozara“ u Banja Luci. Svečanosti su

prisustvovali član Predsjedništva BiH Nebojša Radmanović, zamjenik ministra odbrane BiH za politiku i planove g. Živko Marjanac, zamjenica ministra odbrane BiH za upravljanje resursima gđa Marina Pendeš, načelnik Zajedničkog štaba OS BiH general pukovnik Miladin Milojević sa najbližim saradnicima, predstavnici institucija BiH i entitetskih institucija, predstavnici međunarodnih institucija u BiH, predstavnici diplomatskog kora, kao i brojni visoki vojni i civilni dužnosnici, crkveni velikodostojnici i drugi ugledni gosti.

Smotru puka izvršio je član Predsjedništva BiH Nebojša Radmanović kojem je raport predao komandant 3. pješadijskog (Republika Srpska) puka OS BiH brigadir Rajko Knežević.

Prisutnima na svečanosti prigodnim riječima obratili su se član Predsjedništva BiH Nebojša Radmanović i komandant 3. pješadijskog (Republika Srpska) puka OS BiH brigadir Rajko Knežević.

U okviru obilježavanja 18. godišnjice osnivanja Vojske RS-a 11. maja 2010. godine delegacija Ministarstva odbrane i Zajedničkog štaba OS BiH koju je predvodio načelnik ZŠ OS BiH general pukovnik Miladin Milojević prisustvovala je parastosu za poginule borce VRS u „Hramu Hrista Spasitelja“ u Banja Luci, a na groblju Sv. Pantelija položila je cvijeće za poginule borce VRS.

**ZAMJENIK POMOĆNIKA DRŽAVNOG SEKRETARA SAD ZA  
PLANOVE, PROGRAME I OPERACIJE BRIGADNI GENERAL  
THOMAS J. MASIELLO POSJETIO MO I OS BiH I  
PRISUSTVOVAO AKTIVNOSTI UNIŠTAVANJA NAORUŽANJA**

ma  
13  
2010



Delegacija State Departmenta SAD, koju je predvodio zamjenik pomoćnika Državnog sekretara SAD za planove, programe i operacije brigadni general Thomas J. Masiello, u okviru posjete Ministarstvu odbrane i Oružanim snagama u kasarni „Rajlovac OS BiH“, prisustvovala je 13. 05. 2010. godine aktivnosti uništavanja lakog naoružanja korištenjem tenka.

Aktivnosti uništavanja naoružanja prethodio je zajednički sastanak najviših dužnosnika Ministarstva odbrane i Zajedničkog štaba OS BiH sa delegacijom State Departmenta, nakon kojeg su ministar odbrane dr. Selmo Cikotić i zamjenik pomoćnika Državnog sekretara SAD brig. gen. Thomas J. Masiello, potpisali Zajedničku izjavu o saradnji na uništavanju municije i eksplozivnih sredstava koje je Predsjedništvo BiH identifikovalo kao višak.

Uništavanju naoružanja, osim najviših dužnosnika Ministarstva odbrane i OS BiH i delegacije State Departmenta, prisustvovala je član Zajedničke komisije za odbranu i sigurnost Parlamenta BiH Ivo Miro Jović, ambasador SAD u BiH Charles English, komandant EUFOR-a general Bernhard Bair, predstavnici NATO štaba u BiH, te predstavnici organizacija UNDP, OSCE I OHR-a. Uništavanje lakog naoružanja koje je proglašeno kao višak za OS BiH i lakog naoružanja prikupljenog u operaciji „Žetva“ predstavlja simboličan čin otpočinjanja procesa uništenja viška naoružanja i municije koje predstavlja značajnu opasnost po okolinu i stanovništvo, a koje se nakon procesa uništenja transformira u korisnu industrijsku sirovinu. Danas je tenkom M 60 uništeno po 30 komada automatske puške M16 A1 i automatske puške kalašnjikov, te 25 komada lakog naoružanja prikupljenog u operaciji „Žetva“. Nakon izvršenog uništavanja svi preostali metalni dijelovi naoružanja će biti uništeni metodom topljenja, dok će drveni i plastični ostaci lakog naoružanja biti uništeni spaljivanjem u željezari Zenica.

**GENERAL-PUKOVNIK MILADIN MILOJEVIĆ PRISUSTVOVAO  
SASTANKU VOJNOG KOMITETA NATO-ISAF U BRISELU**

ma  
05  
2010



Načelnik Zajedničkog štaba OS BiH general-pukovnik Miladin Milojević u periodu od 05 do 06. 05. 2010. godine prisustvovala je sastanku Vojnog komiteta NATO-ISAF format u Briselu te posjetio NATO komandu za operacije u Monsu.

Na sastanku Vojnog komiteta NATO-ISAF format razmijenjene su informacije o trenutnom stanju u Afganistanu i planovima za naredni period.

U čast prvog zvaničnog dolaska načelnika ZŠ OS BiH general-pukovnika Miladina Milojevića u Komandi za operacije NATO u Monsu delegaciji OS BiH upriličena je svečana ceremonija koju je organizovao zamjenik komandanta Komande savezničkih snaga za Evropu general Sir John McColl. General-pukovnik Miladin Milojević upoznao je generala McColla o stanju OS BiH, planovima za misiju ISAF i o misiji EUFOR-a u Bosni i Hercegovini. Poslije razgovora sa generalom McCollom delegacija OS BiH posjetila je i Upravu za vojnu saradnju gdje je general-pukovniku Miladinu Milojeviću prezentovana rad NATO komande za operacije kao i rad Uprave za vojnu saradnju ove komande.



# MO I OS BIH DOMAĆIN 51.SVJETSKOG VOJNOG PRVENSTVA U SKIJANJU 2011.GODINE

Nakon prihvatanja kandidature Bosne i Hercegovine od strane Direktorijata Međunarodnog vojnog komiteta za sport (CISM), Ministarstvo odbrane i Oružane snage BiH biće domaćin i organizator 51.Svjetskog vojnog prvenstva u skijanju, koje će se održati 2011. godine. Takmičenja će se izvoditi u četiri discipline: 1.alpska disciplina veleslalom, 2.nordijsko trčanje za žene i muškarce na 10 i 15 kilometara, 3.biatlon – takmičenje na 7 i 10 kilometara za žene i muškarce, 4.ekipno – štafeto trčanje. Takmičenja će se izvoditi na olimpijskim planinama Igmanu, Bjelašnici i Jahorini. Oružane snage BiH su 2007. postale punopravna članica CISM-e. Njihovi pripadnici aktivno učestvuju na sportskim događajima koje organizuje CISM, a do sada su bili na Vojnim olimpijskim igrama u Indiji, zatim svjetskom prvenstvu u odbojci u Njemačkoj, kao i regionalnim sportskim takmičenjima. Od prošle godine smo domaćini Regionalne kros trke, na kojoj je učestvovalo sedam država iz regiona. U ovom trenutku Oružane snage Bosne i Hercegovine su u potpunosti spremne za održavanje 51. Svjetskog vojnog prvenstva u skijanju i doček najboljih vojnika – sportista iz cijelog svijeta. Takmičari 51. Svjetskog vojnog prvenstva u skijanju biće smješteni u kasarni «Rajlovac», koja se nalazi na zapadnoj strani grada Sarajeva. Udaljena je od Sarajevskog aerodroma 5 km, a od centra grada 12 km. Kasarna «Rajlovac» raspolaže smještajnim kapacitetom za 1200 osoba i pratećim objektima: kuhinjskim blokom, ambulantom, sportskom salom, kantinom, internet klubom, salom za sastanke, amfiteatrom i dr. Nadamo se i vjerujemo da će naša tradicija, volja i spremnost doprinijeti uspješnoj realizaciji i ovog značajnog sportskog događaja. Iz dubine srca radujemo se dolasku naših kolega iz svijeta, uvjereni da ćemo ispunjavanjem svojih obaveza kao organizatori, i pružanjem svoga gostoprimstva kao domaćini, steći nove prijatelje i saborce u ostvarivanju naše zajedničke misije očuvanju svjetskog mira i učvršćivanju sigurnosne arhitekture za današnje i buduće generacije.

